

○諭

軍機大臣等。本日裕泰等奏。湖北崇陽縣匪徒聚眾攻入縣城一摺。據稱該縣刀徒鍾人杰。前因包庇程中和吃煤圖利。擬徒配逃。查拏未獲。與民人挾有夙嫌。欲圖報復等語。該犯鍾人杰以無賴匪徒。何至因有釁端。輒敢聚眾入城。搶劫監獄倉庫。拒捕捆官。情節殊難憑信。據該縣師長治之子稟稱匪徒黨羽甚多。恐係蓄謀已久。該縣僻處山陬。地面並不遑聞。何以匪徒聚眾。該縣毫無聞見。其中顯有別情。著裕泰、趙炳言。一面派兵緝拏各犯。一面飛咨鄰省協力防堵。其為首之犯。務當即速拏獲。毋任遠颺滋蔓。裕泰現已帶兵前往。並有郭熊飛等會同兜拏。著即嚴切訊究起釁根由。何人為首。是否係地方官激成事端。總須水落石出。分別嚴辦。迅速完結。湖北省城一帶。饑民甚多。趙炳言坐鎮省垣。必須妥為彈壓。不可令其聞風驚疑。或致勾串。儻現獲各犯。供出黨羽散在各處。亦即密咨分緝。勿留餘孽。是為至要。將此諭令知之。